

四庫全書

子部

欽定四庫全書

子部

實賓錄卷二

詳校官中書<sub>臣</sub>李彤

侍讀<sub>臣</sub>孫球覆勘

謄錄副貢生<sub>臣</sub>杭光晉

欽定四庫全書

子部十一

提要

實賓錄十四卷

類書類

臣等謹案實賓錄十四卷宋馬永易撰永易字明叟揚州人徽宗時嘗官池州石埭尉其事迹無可考見惟文獻通考宋史藝文志載所著有唐職林元和朋黨錄壽春雜志諸書蓋亦博洽之士也是書見于晁公武讀書志

者稱異號錄二十卷而陳振孫書錄解題則題作實賓錄謂永易所撰蜀人句龍材校正文彪增廣凡本書三十卷後集三十卷宋史藝文志又分實賓錄異號錄各三十卷皆題永易所撰諸家紀載頗舛錯不合今以其說互相參証疑陳氏所稱本書乃永易原撰本名異號錄陳氏所稱後集即文彪所續始取名為實賓之義併本書改題今名宋志蓋誤

分為兩書而晁公武所見則為未經增廣之本故尚題為異號錄也自元以來其書久佚陶宗儀收入說郛者僅寥寥數條近浙江所進范氏天一閣藏本亦即從說郛鈔出一字不殊今從永樂大典蒐輯共得六百餘條皆說郛之所未載惟原帙既湮其體例已無可考即永易原本與文彪所增亦錯雜不可復辨謹裒輯編綴芟除重複訂正舛訛各以類

相從釐為一十四卷仍從書錄解題統標曰  
實賓錄以存宋時傳本之舊其書皆取古人  
殊名別號以廣見聞領異標新頗資採掇至  
於搜羅既廣偶涉舛訛如沈傳師之推為顏  
子乃比擬之空言劉長卿之五言長城乃品  
題之泛論皆非標目不應闌入其間又如吉  
茂言侍中執虎子語本詆諧白居易賦新豐  
折臂翁詞由徵實凡此之類尤與稱謂無關

一槩濫收殊失別擇是則嗜異貪多為千古  
著書之通病不獨永易為然固不以累其全  
書矣乾隆四十六年九月恭校上

總纂官

臣紀昀  
臣陸錫熊  
臣孫士毅

總校官

臣陸費墀



欽定四庫全書

實賓錄卷一

宋 馬永易 撰

木皇

太昊位居東方以含養造化叶于木德號曰木皇

太平天子

則二

唐王遠知得道於陶隱居高祖之龍潛也遠知嘗密傳符命太宗平王世充與房玄齡微服以謁之遠知迎謂曰此中有聖人得非秦王乎太宗因以實告遠知曰方

金史卷一百一十五 卷一  
作太平天子願自惜也

唐明皇為皇孫時嘗於朝堂叱武攸暨曰朝堂我家朝堂汝安得恣蜂蠆而狼顧耶則天聞而驚異之曰此兒器槩當為吾家太平天子

明主

魏朱靈為袁紹將太祖之征陶謙紹使靈督三營助太祖戰有功紹遣諸將各罷歸靈曰吾觀人多矣若曹公者此乃真明主也今已遇復何之遂留不去

撥亂主

唐竇抗太穆皇后之姪也初煬帝遣抗出靈武連護長城聞高祖已定京師喜曰此吾家婿豁達有大度真撥亂主也

銅馬帝

漢光武與銅馬賊大戰於蒲陽悉破降之故關西號光武為銅馬帝

白版天子

東晉渡江初失傳國璽故北方人謂晉為白版天子

無愁天子

北齊幼主高恒失道每災異寇盜不自貶損唯諸處設齋以此為修德初瑯琊王舉兵反告者誤云庫狄伏連反帝曰此必仁威也又斛律光死後諸武官舉高思好堪大將軍帝曰思好喜反皆如所言遂自以策無遺算乃益驕恣盛為無愁之曲自彈胡琵琶而唱之侍和之者以百數人間謂之無愁天子

和事天子

唐中宗景龍二年詔突厥娑葛為金河郡王而其部闕  
啜忠節賂宗楚客等罷之娑葛怨將兵患邊監察御史崔  
琬廷奏楚客與紀處訥專威福有無君心納境外交為  
國取怨楚客弟晉卿專徇賊私驕恣跋扈並請收付獄  
三司推鞠故事大臣為御史對仗彈劾必趨出立朝堂  
待罪楚客乃厲色大言性忠鯁為琬誣詆中宗不能窮  
也詔琬與楚客處訥約為兄弟兩解之故世謂帝為和

事天子

西王東王

魯昭公二十三年南宮極震葢弘曰周之亡也其三川震今西王之大臣亦震天奔之矣東王必大克註云子朝在王城故謂西王敬王居狄泉在王城之東故曰東王

賢王

後漢沛獻王輔光武子也矜嚴有法度在國謹節始終

如一稱為賢王

黠涉為王

漢陳勝字黠涉少時常與人傭耕輟耕之隴上悵然甚  
久曰苟富貴無相忘傭者笑之後勝為王傭耕者聞之  
乃之陳叩宮門門吏令不肯通勝出遮道而呼涉乃召  
見載與歸入宮見殿屋帷帳客曰黠涉之為王沈沈者  
楚人謂多為黠故天下傳之黠涉為王黠音禍沈沈宮  
室深邃之貌沈長舍反

按史記前漢書皆稱陳勝字涉此書獨云字黠涉似因下文黠

涉一語而誤今姑仍其舊又史記云夥頤涉之為王沉沉者較班書多一頤字附記於此

### 洛生王

後周宗室莒莊公洛生少任俠好施愛士北州賢俊皆與之遊而才能多出其下及葛榮破鮮于修理以洛生為漁陽王時人皆呼為洛生王

### 小鄭王

唐鄭惠王元懿高祖子既薨長子璆嗣璆子察言生二子曰白仙翽自仙生夷簡翽生宗閔璆弟琳生擇言擇

言生勉宗閔夷簡位宰相時稱小鄭王後亦曰鄭惠王  
後以別太祖子鄭王亮云

### 佞王

後魏宗室元順性褻譎淡於營利為侍中嘗鯁言正議  
俄為城陽王徽所間出為太常卿後為吏部尚書兼右  
僕射與城陽王徽同日拜職舍人鄭儼於止車門外先  
謁徽後拜順怒曰卿是佞人當拜佞王我是直人不  
受曲拜儼深媿謝

三王

則五

漢文三王叙傳云孝文三王代孝二梁謂代孝王參梁孝王武梁懷王揖

漢淮南厲王高帝少子也以罪失國後文帝以厲王三子分王淮南故地安為淮南王賜為衡山王勃為濟北王吳王濞遺諸侯書曰淮南三王怨入骨髓欲壹有所出久矣又鄒陽上吳王書云淮南三王之心思墳墓

漢武帝同日封皇子闕為齊王旦為燕王胥為廣陵王

史記列為三王世家云

後漢馮異既平朱鮪諸將勸光武即帝位光武召異問  
四方動靜異曰三王反畔更始敗亡天下無主宗廟之  
憂在於大王宜從衆議上為社稷下為百姓註云三王  
謂張卬為淮陽王廖湛為穰王胡商為隨王更始欲殺  
三王遂勒兵掠東西市入戰宮中更始大敗

後魏宗室濟南王彧少有才學與從兄安豐王延明中  
山王熙並以宗室博古文學齊名時人莫能定其優劣

尚書郎范陽盧道將謂吏部郎清河崔休曰三人才學  
雖並優美然安豐少於造次中山皂白太多未若濟南  
風流寬雅時人為之語曰三王荆楚琳瑯未若濟南備  
員方或姿制閑雅吐發流靡琅瑯王誦有名人也見之  
未嘗不心醉忘疲

五王

則二

晉大安之際童謡曰五馬泛渡江一馬化為龍及王室  
淪覆元帝與西陽汝南南頓彭城五王獲濟而帝竟登

天位焉

齊竟陵王蕭子良狀云大春屈已於五王君大降節於  
憲后註云後漢井丹字大春建武末沛王輔等五王居  
北宮皆好賓客更遣請丹不能致信陽侯陰就光烈皇  
后弟也以外戚貴盛詭說五王求錢千萬約能致丹別  
使人要劫之丹不得已既至就故為設麥飯葱菜之食  
丹推去之曰君侯能供甘旨故來相遇何其薄乎更致  
盛饌乃食君大荀恁字憲后東平憲王蒼也

八王

晉汝南王亮楚王瑋趙王倫齊王冏長沙王義成都王  
穎河間王顥東海王越自惠帝失政骨肉諸王乃構釁  
詩所謂誰生厲階至今為梗其八王之謂矣向使八王  
之中一藩翳賴如梁王之禦大敵朱虛之除大慙則外  
寇焉敢憑陵內難奚由竊發

麻膏相公

唐崔胤字垂休宰相慎由子也喜陰計附離權強其外

自處若簡重而中險譎可畏五拜相權傾天下人改呼  
油為麻膏以避其父諱而天下之人號盾為麻膏相公

三九相公

鄭畋年十九赴舉凡十九年登第又十九年入相時號

三九相公

白沙相公

李愚所居暴雨一庭俱為白沙及薨得地於白沙里時

號白沙相公

曲子相公

五代晉和凝少年時好為曲子詞布於汴洛洎入相專托人收拾焚毀不暇然相國厚重有德終為豔詞玷之契丹入夷門號為曲子相公

十八學士

唐太宗武德四年為天策上將軍寇亂稍平乃鄉儒宮城西作文學館收聘賢才於是下教以杜如晦房喬于志寧蘇世長薛收褚亮姚思廉陸德明孔穎達李玄道

李守素虞世南蔡允恭顏相時許敬宗薛元敬蓋文達  
蘇勉並以本官為學士收卒復以劉孝孫補之凡分三  
番遞宿於閣下悉給珍膳每暇日訪以政事討論墳籍  
權略前載無常禮之間命閤立本圖象褚亮為之贊題  
名字爵里號十八學士藏之書府以彰禮賢之重方是  
時在選中者天下慕向謂之登瀛洲云

青錢學士

唐張鷟八以制舉中甲科四參選判策為銓府最考功

金史卷一百一十五  
卷一  
員外郎騫味道稱驚文詞猶青銅錢萬選而萬中時號  
為青錢學士

輕薄祭酒

齊孔廣字淹源以才學知名美容止善吐納王儉張緒  
咸美之儉常云廣來使人廢簿領拒不須來來則莫聽  
去緒時為國子祭酒數巾車詣之每嘆曰孔廣使吾成  
輕薄祭酒

軟餅中丞

偽蜀韋縠唐相貽範之子仕孟昶時歷御史中丞性多  
依違時號為軟餅中丞

李御史

北齊李行之為齊郡太守帶青州長史任城王敬憚之  
州人號曰李御史

縮葱御史

唐侯思止懶不治事遷左臺御史嘗命作籠餅謂膳者  
曰與我縮葱作之故時號縮葱御史

呈身御史

唐韋澳貫之子也方靜寡慾御史中丞高元裕與其兄溫善欲薦用之諷澳謁已溫歸以告澳不答溫曰元裕端士若輕之耶澳曰然恐無呈身御史

綠袍員外 侏儒郎中

唐鄧元挺辨捷時兵部侍郎韋慎形容極短時人弄為侏儒元挺初得員外已後郎中員外俱來看韋慎曰慎以庸鄙濫任郎官公以高才更作綠袍員外鄧即報云

綠袍員外何由及侏儒郎中衆皆大笑

何需郎中

唐進士何需亮自外州至訪其從叔誤造郎中趙需宅  
自云同房會冬至需欲家宴謂需亮云既是同房便令  
入宴姑娣妹妻子盡在焉需亮饌畢徐出乃細察之何  
氏之子也需大笑需亮歲餘不敢出京城時號趙為何  
需郎中

判詩博士

五代王仁裕少不知書因夢吞五色小石無數遂有文章敏速甚異於人與賓酬和不問多少韻數立命筆和送題云走筆猶自矜謂人曰某官詩輒已批回漢丞相兵部尚書李濤素滑稽戲目之為判詩博士

王門下彈琴博士

唐左拾遺魏光乘目袁輝為王門下彈琴博士

白馬從事

後漢淳于臨等聚數千人屯瀟山揚州牧歐陽歛遣兵

不能克帝議欲討之廬江人陳衆為從事白歛請得諭  
降臨於是乘單車駕白馬往說降之瀟山人共生為立  
祠號白馬從事

南廊承旨

五代江南林仁肇建陽人兄仁翰為福州王延羲內兒  
謂之南廊承旨

軺車督郵

漢許慶字子伯家貧為督郵乘牛車鄉里號為軺車督

郵

黃車使者

漢虞初武帝時以方士侍郎乘馬衣黃衣號黃車使者為周說九百四十三篇其說以周書為本

花鳥使

唐呂向為集賢校理時玄宗歲遣使采擇天下姝好內之後宮號花鳥使向奏美人賦以諷帝善之

可喜進馬

唐李瑒字思貞任東宮進馬美姿儀治章服孝敬號為可喜進馬

東中郎將

二則

後漢末有四中郎將皆帥師征伐董卓為東中郎將

蔣濟字子通文帝即位為東中郎將

外軍校尉

唐則天時左史東方虬身長衫短骨面麤眉目郎中張元一目為外軍校尉

蠻府參軍

晉郝隆為桓公南蠻參軍三月三日會作詩不成者罰酒二升隆初以不能罰酒飲畢攬筆作一句云蝦隅躍清池桓問蝦隅是何物答曰蠻名魚為蝦隅桓公曰作詩何以蠻語隆曰千里投公始得蠻府參軍那得不蠻語

青衫外郎

太牢乃元和中青衫外郎爾穆宗世因承和薦不三二

年位兼將相

原註牛羊日厯  
謂牛僧孺云

著緋進士

唐杜昇宣猷之子也自右拾遺賜緋却擢進士復拜拾遺時號著緋進士朝廷榮之

無解進士

唐相令狐綯子瀉招權納賄不拔解而就試天下號無解進士

進士中進士

吳游恭幼聰悟為辭章士大夫稱之時選舉避宰相崔  
肩家諱恭以姓犯其嫌名累年不第乾寧中禮部侍郎  
獨孤損擢為上第唐末貢舉多請託時謂恭及殷文圭  
為進士中進士

國師

二則

漢王莽以劉歆為國師歆後自殺更以訢為國師

後魏劉延明隱居酒泉教授為業蒙遜禮待月致羊酒  
牧犍尊為國師親自致拜命官屬以下皆北面受業

## 太尉

唐蕭遘初為右拾遺與韋保衡聯第而遘姿寓秀偉意氣孤峻常慕李德裕為人保衡才下諸儒靳薄之不甚齒獨呼遘太尉保衡憾焉及保衡為相摭遘罪繇起居舍人斥播州司馬舊傳云遘志操不羣自比李德裕同年皆戲呼為太尉

## 小太尉

唐李晟官至太尉其子愬亦贈太尉時杜牧題永崇西

平王宅太尉愬院詩云天下無雙將關西第一雄授符  
黃石老學劍白猿翁矯矯雲長勇恂恂郤縠風家呼小  
太尉國號大涼公半夜龍驤去中原虎穴空隴西兵十  
萬嗣子握琯弓註愬與弟聽皆封涼國公故曰大涼公  
也

執虎子

魏蘇則為侍中舊儀侍中親省起居故俗謂之執虎子  
始則同郡吉茂由是時仕甫歷縣令遷為冗散茂見則

嘲之曰仕進不止執虎子則笑曰我誠不能效汝蹇蹇  
驅鹿車馳也

枯松太保

偽蜀王宗裕建之宗屬善遁甲從平東川諸將爭功宗  
裕獨立於枯松下未嘗自伐人皆服其謙謂漢有大樹  
將軍號宗裕為枯松太保

大樹將軍

漢馮異拜偏將軍從破王郎封應侯為人謙退不伐行

與諸將相逢輒引車避道進止皆有表識軍中號為整  
齊諸將並坐論功異常獨屏樹下軍中號曰大樹將軍

真將軍

漢文帝命周亞夫為將軍屯兵細柳上自勞軍至中營  
亞夫揖曰介冑之士不拜請以軍禮見天子為動容式  
車使人稱謝而去既出軍門羣臣皆驚文帝曰嗟乎此  
真將軍矣

飛將軍

漢李廣才氣天下無雙出獵見草中石以為虎而射之  
中石矢沒視之石也拜右北平太守在郡匈奴號曰漢  
飛將軍避之數歲不入界

飛將

唐太原李克用既平黃巢楊復光捷布曰克用殺賊無  
非手及入陣率以身先可謂雄才得名飛將

疾雷將

唐鄭畋為鳳翔節度使時寇盜充斥四方多故畋選銳

卒號疾雷將

賢將

則二

唐李晟封西平王史臣曰西平器偉材雄見義能勇聽受不疑忠於事君長於應變誠一代之賢將也

張孝忠佐李晟赴難收京師河北蝗民饑死如積土孝忠與其下同粗淡日膳豆腊而已人服其儉推為賢將健將

晉陶侃初擊杜弼時周顗為荊州刺史先鎮潯水城賊

掠其良口侃部將朱伺救之賊退保泠口侃謂諸將曰  
此賊必更步鄉武昌吾宜還城晝夜三日行可至卿等  
誰能忍饑餓鬪邪部將吳寄曰要欲十日忍饑晝當擊  
賊夜分捕魚足以相濟侃曰卿健將也賊果增兵來攻  
侃使朱伺等逆賊大破之

神將

則二

唐常袞為馬璘神道碑曰以忠才而親重有絳侯之遇  
也以簡質而倚愛有吳漢之信也所謂國之神將朝之

金史卷一百一十五  
卷一  
蓋臣

梁冠彥卿身長八尺隆準方面事太祖皆如旨太祖甚重之賜以所乘愛馬一丈烏太祖圍鳳翔彥卿為排陣使乘馬馳突陣前太祖目之曰真神將也

三驍將

五代蜀王宗滌為將好謀得衆所向克捷與王宗賀宗恪相善時稱三驍將

佳將

吳賀達輕財貴義膽烈過人有征戰之勞弟景馭衆嚴而有恩兵器精飾為當時冠絕皆有令名為佳將

武原將

齊周山圖年十五六氣力已絕衆宋元嘉二十七年魏軍至瓜步臺符取健兒山圖應募領白衣隊主軍功加振武原將魏軍稱其勇呼為武原將

名將

郝玘為原州刺史在邊積三十年每討賊不持糗糧取

之於敵獲虜必剗剔而歸其屍敵大畏道其名以怖啼  
兒贊普常等玼身鑄金象令於國曰得生玼者以金玼  
償之朝廷畏失名將徙為慶州刺史

厭新將軍

後漢宗室茂泗州王歛之從父弟初漢兵之起茂自號  
劉失職續漢志云劉失職聚衆京密間稱厭新將軍

良二千石

魏自太祖迄於咸熙魏郡太守吳瓘清河太守任燠京

兆太守顏裴弘農太守令狐邵濟南相孔義或哀矜折獄或推誠惠愛或治身清白或擿姦發伏咸為良二千石

薄德二千石

晉許玄度傳都一月劉尹無日不往乃嘆曰卿復少時不去使我為薄德二千石

賢刺史

五代南唐劉仁瞻為黃州刺史仁瞻聰敏長於吏事親

金史卷一百一十五  
總簿書更革蠹弊人皆稱為賢刺史

鐺脚刺史

唐薛大鼎為滄州刺史時鄭德本為瀛州賈敦頤為冀州皆有治名故河北稱鐺脚刺史白居易任蘇州寄賈常州崔湖州詩曰愧無鐺脚政徒忝犬牙鄰蓋取諸此

癩兒刺史

後魏崔暹為瀛州刺史貪暴安忍州人患之常出獵州北單騎至村問汲水婦人曰崔瀛州如何答曰百姓何

罪得癩兒刺史如此遲默然而去

十司戶

唐咸通中韋保衡路巖作相除不附已者十司戶崔沆

循州續繡州蕭遘播州崔彥融雷州高湘高州張顏播

州李旣勤州杜喬休端州鄭彥時

原本缺

州李藻費州內

繡州雷州播州三人不回

八司馬

元和初黜八司馬韋執誼崔州韓太虔州柳宗元永州

劉禹錫朗州韓曄饒州凌準連州程異柳州見玉泉子  
中漏一人以實錄考之時王伾貶開州司馬意王伾其  
一也

十指揮使

五代楚劉言為朗州留後先是南唐命邊鎬率師入長  
沙盡俘馬氏之族歸於金陵江南召言入覲言不行因  
令副使王逵行軍司馬何景真指揮使張放蒲公益朱  
全琇宇文瓊周行逢彭方和潘叔嗣張文表等號十指

揮使同率兵攻湖南逐鎬奔江南復馬氏境土有之

健令

五代後蜀李正遠同光中董璋以為鹽亭通泉射洪等  
令時兩川連橫羣盜尤盛正遠所在擒捕當時號為健  
令

神宰

唐張楚金道源族孫也與兄越石皆舉進士州欲獨薦  
楚金固辭請俱罷都督李勣嘆曰士求才行者也既能

讓何嫌皆取乎乃並薦之歷虞鄉令畧無留事號為神宰

名宰

唐杜黃裳贊曰子貢孔堂高弟而化貨殖韓安國漢名宰而恣貪黃裳亦以受餉見疵至於忠烈堯然則不可掩已又云肅昕始薦張鎬來瑱在禮部擢杜黃裳高郢裴均其後高興布衣不數年位將相瑱為將有威名黃裳等相繼輔政並為名宰云

能吏

李叔明為洛陽令招徠遺民號為能吏

良守

崔攸少有風槩為東郡太守省民兵役郡內感之大學  
舊在城內攸移置城南閒敞處親自說經當時學者莫  
不勸勉號為良守

良吏

李潛拜虢潞二州刺史所歷皆以誠信待物稱為良吏

周魴事晉為梁州刺史既在襄陽務農訓卒勤於採納  
威風既著遠近悅服智勇過人為中興良吏

九州伯 五湖長

晉桓玄溫之子也二十三始拜太子洗馬時議謂溫有  
不臣之迹故折玄兄弟俱為素官太元末出補義興太  
守鬱鬱不得志嘗登高望震澤嘆曰父為九州伯兒為  
五湖長棄官歸國

尉佗

漢南粵王趙佗初為龍川令南海尉任囂病且死召佗語曰番禺負山險阻可為國郡中長吏亡足與謀者故召公告之即被佗書行南海尉事後號為尉佗

良史

九則

魯宣公二年孔子曰董狐古之良史也書法不隱趙宣子古之良大夫也為法受惡惜也越境乃免

魯昭公十二年楚左史倚相趨過王謂子革曰是良史也

漢班固論曰司馬遷班固父子其言史官載籍之作大義粲然著矣議者咸稱二子有良史之才

魏劉邵建安中為計吏詣許太史上言正旦當日蝕時或云當廢朝邵曰梓慎禪竈古之良史猶占水火錯失天時禮記諸侯旅見天子及門不得終禮者四日蝕在一然則聖人垂制不為變豫廢朝禮者或災銷異伏或推述謬悞也苟或善其言勅朝會如舊日不蝕

晉孫盛字安國篤學不倦著魏氏春秋晉陽秋詞直理

正咸稱良史史臣曰安國有良史之才而所著之書惜  
非正典

晉干寶著晉記其書簡畧直而能婉咸稱良史

晉華嶠有才學撰後漢書世稱為良史

齊永明中太子與湘東王書曰時有效謝康樂鴻臚亦  
頗有感焉何者謝君吐言天拔出於自然時有不拘是  
其糟粕裴史乃良史之才無篇什之美

唐陳叔達答王績書曰薛記及賢兄芮城常悲魏周無

史各著春秋近更研覽真良史也

四時仕宦

唐傳游藝初由合宮主簿再遷左補闕時人號為四時仕宦言一年自青而綠及於朱紫也

欽定四庫全書

實賓錄卷二

宋 馬永易 撰

任孔子

後漢任丘少好學隱於山連辟不就時人號曰任孔子

杜孔子

杜育童孺奇才博學能文心解性達無所不綜一時以  
為武陽杜孔子

關西孔子

二則

劉孝標辨命論云近世有沛國劉瓛弟珽並一時之秀士也瓛則關西孔子通涉六經循循善誘服膺儒行濟濟有辭致見者奇之其後才名益著

唐蕭德言博涉經史尤精左氏春秋太宗以為著作郎弘文館學士以老請致仕太宗不許又遺書曰濟南伏生重見於茲日關西孔子故顯於當今

按關西孔子之號始於後漢楊

震附記

江東孔子

陳顧野王吳人也博識洽聞多所著述時人號曰江東孔子

仲尼不死顏回復生

後漢孔融與禰衡更相贊揚衡謂融曰仲尼不死融答曰顏回復生

推為顏子

唐沈傳師材行有餘工書有楷法貞元末進士擢第權德輿知貢舉門生七十人推傳師為顏子

宗曾子

南齊宗元卿有志行早孤為祖母所養祖母病元卿在  
遠輒心痛大病則大痛小病則小痛鄉里崇事之號宗  
曾子

今世曾子

齊劉瓛有至性祖母病疽經年手持膏藥漬指為爛母  
孔氏甚嚴明謂親戚曰阿稱便是今世曾子稱瓛小名  
也

蔡曾子

齊有蔡曇智至性孝友鄉里號蔡曾子廬江何伯興兄弟號為何展禽並為沈顗所重

海東曾子

唐百濟王義慈事親孝與兄弟友時號海東曾子

顏冉仲弓

後漢趙戢遇三輔亂客荊州時禰衡來遊渭北言朝士及南見戢曰所謂劒則干將莫耶木則椅桐梓漆人則

顏冉仲弓

召虎

魏張遼破孫權合肥之圍先登陷陣幾獲權後遼朝洛陽宮文帝引遼會建始殿親問破吳狀帝嘆息顧左右曰此亦古之召虎也為起第舍

管鮑

梁趙儼初避亂荊州與龔繁欽通財為一家時人號為

管鮑

仲父二

則

秦范雎相昭王王謂平原君曰昔文王得呂尚以為太公齊桓得管夷吾以為仲父今范君亦寡人之仲父也  
晉王導任丞相元帝委仗情好日密朝野傾心號仲父  
甯武子

晉衛瓘性正靜有名理以明識清允稱魏末為中書郎時權臣專政瓘優游其間無所親疎甚為傳嘏所重謂之甯武子

晏平仲

二則

晉庾冰心有儉操嘗曰吾晏平仲也及卒無絹為衾又室無妾媵家無私積世以此稱之

五代吳越曹師魯為鎮東軍都押衙師魯短小多智武肅王曰今之晏嬰也人號為曹嬰

今董狐

唐吳兢在長安景龍間任史事時辭事多不實兢叙事簡核號良史初與劉子玄撰定武后實錄叙張昌宗誘

張說誣證魏元忠事頗言說已然可賴宋璟等激勵苦切故轉禍為忠不然皇嗣且殆後說為相讀之心不善知兢所為從容謬謂曰劉生書魏齊公事不少假借奈何兢曰子玄已亡不可受誣地下兢實書之其草故在聞者歎其直說屢以情斬改辭曰狗公之情何名實錄卒不改世謂今董狐云

吳氏季子

後漢吳祐父恢為南海太守祐年十二歲隨從到官恢

欲殺青簡以寫經書祐諫曰昔馬援以薏苡以興謗王陽以衣囊微名嫌疑之間誠先賢所慎恢乃止撫其首曰吳氏世不乏季子矣

甯越

晉王安期作東海郡吏錄一犯夜人主問何處來云從師家授書還不覺日晚王曰鞭撻甯越以立威名恐非政化之本使吏送令歸家

尾生

鄒陽上書吳王曰蘇秦不信於天下為燕尾生注云尾生古之信士秦說齊還燕十城又令厚葬以弊齊終死為燕也

扁鵲

六國時扁鵲姓秦名越人善醫以其與黃帝時扁鵲相類故號扁鵲

許由東隣

唐田游巖隱箕山居許由祠旁自號許由東隣頻詔不

起

按田游巖唐高宗時人隱箕山此書誤作田巖游箕山今改正

### 勾踐

晉孫恩據會稽乃曰天下無復事矣當與諸君朝服而至建康及劉牢之臨江又曰我不失作勾踐牢之已濟江又曰孤不羞走乃入海

### 樊噲

魏許褚容貌雄毅勇力絕人漢末聚少年及宗族數千家共堅壁以禦寇偽與賊和以牛與賊易食賊來取牛

牛輒奔還褚乃出陳前一手逆曳牛尾行百餘步賊衆驚遂不敢取牛而走皆畏憚之俄以衆歸太祖太祖見而壯之曰此吾樊噲也拜都尉引入宿衛諸從褚俠客皆以為虎士

相如

唐盧照鄰博學善屬文初授鄧王府典籤王甚愛重嘗曰此即寡人之相如也

陳遵

東海王越以劉輿為長史越既總錄尚書以輿為上佐  
賓客滿庭文案盈几遠近書記日有數千終日不倦或  
以夜繼之時人服其能比之陳遵

我家東阿

南齊隨郡王子隆武帝子也性和美有文才娶王儉女  
武帝以子隆能屬文謂儉曰我家東阿也

王粲

四則

晉符融聰明辨慧下筆成章至於談玄論道謝安無以

出之耳聞則誦過目不忘時人擬之王粲

宋謝方明命何長瑜教其子惠連讀書謝靈運謂方明曰阿連才悟如此而尊作常兒遇之何三長瑜今之仲宣而飴以下客之食尊既不能禮賢宜以長瑜見還遂載而去

北齊邢邵嘗與裴伯茂並於北海王所舍宿歇相與賦詩數十首皆在主人奴處旦日奴行諸人求詩不得邵皆為之誦奴還得本不誤一字諸人方之王粲

唐蘇晉數歲知為文作八卦論吏部侍郎房頴叔秘書監  
王紹宗歎曰後來之王粲也

我家任城

齊長沙威王晃少有武力為高帝所愛從駕以馬稍刺  
道邊枯樹上令數人引之銀纏皆卷稍不出乃令晃復  
馳馬拔之應手便去每遠州獻駿馬上輒令晃調試之  
帝常曰此我家任城也

梁廬陵王續膂力絕人馳射遊獵發便命中高祖常曰

此吾家任城

卿之士龍

梁大同中驟雨殿前有雜色寶珠梁武有喜色虞寄因上瑞雨頌梁武謂其兄荔曰此頌清拔卿之士龍也

荀奉倩 袁曜卿

晉王濛美姿容嘗覽鏡自照稱其父訥字曰王文開生如此兒邪居貧帽敗自入市買之嫗悅其貌遺以新帽時人以為達與沛國劉惔齊名友善惔嘗稱濛性至通

而自然有節濛每云劉君知我勝我自知晉書云時人以劉惔方荀奉倩濛比袁曜卿凡稱風流者舉劉惔為宗焉

陶彭澤

唐元德秀天與慈孝官不違親貞不絕俗隱陸渾山晦迹琴酒寓興於文時謂之陶彭澤而清濈過之

似袁粲

梁王筠清淨好學沈約見筠以為似外祖袁粲謂僕射

張稷曰王郎非惟額類袁公風韻都欲相似

小褚公

齊何戢為吏部尚書美容儀動止與褚彥回相慕時人號為小褚公

曹鄭

齊劉瓛字子珪篤志好學儒業冠於當時都下士子貴族莫不下席受業當世推其大儒以比古之曹鄭性謙率不以高名自居住在檀橋瓦屋數間上皆穿漏學徒

莫敢指斥呼為青溪

鮑謝

唐元稹以詩名元和間宰相令狐楚一代文宗雅知稹之辭學謂曰嘗覽足下製作所恨不多遲遲久矣請見其所有以豁其懷稹因獻其文楚深稱賞以為今代之鮑謝也

陳白舍人

五代江南陳瀾尚書自言其父在鄉里好為詩里人謂

之陳白舍人比之白樂天也

可方桓靈

晉武帝嘗南郊祀畢問劉毅曰卿以朕方漢何帝也對曰可方桓靈帝曰吾雖不及古人方之桓靈其已甚乎對曰桓靈賣官錢入官庫陛下賣官錢入私門以此言之殆不如也帝曰桓靈之世不聞此言今有直臣故不同也

樗里子



樗里子名疾秦惠王之弟也其室在昭王廟西渭南陰鄉樗里故俗謂之樗里子

汝南子

後漢戴憑汝南平輿人能學京氏易為侍中數進見問得失帝謂憑曰侍中當正補國政勿有隱情憑對曰陛下嚴帝曰朕何用嚴憑曰伏見前太尉西曹掾蔣遵清亮忠孝學通古今陛下納膚受之愬遂致禁錮世以為嚴帝怒曰汝南子欲黨乎憑出自繫廷尉有詔勅出尋

勅解遵禁錮

東臯子

唐王績絳州龍門人性簡放遊北山東臯葛巾躬畊每著書自號東臯子

東巖子

唐李白上安州裴長史書曰昔與逸人東巖子隱於岷山之陽白巢居數年不迹城市養奇禽千計呼皆就掌取食了無驚猜太守聞而異之詣廬親覩因舉二人以

有道並不起此則自養高志忘機不屈之迹也

猗玗子

唐元結少居商餘山天下兵興逃亂入猗玗洞始稱猗玗子

竟陵子

唐陸羽復州竟陵人隱於江湖稱竟陵子

梁丘子

唐白履忠浚儀人貫知文史高尚不仕居古大梁城號

梁丘子

丘園子

五代蜀程賁隱居西蜀自號丘園子立身介潔言動必循禮則尤嗜酒復喜藏書簡冊鉛槧未嘗離手

鬼谷先生

鬼谷先生姓王名詡晉平公時隱居鬼谷注徐廣曰潁川陽城有鬼谷因以為號蘇秦張儀從之學縱橫二子欲馳騖於諸侯之國以知詐相傾奪不可化以至道蘇

秦張儀學成別去先生以履一隻化為犬以引二子即日到秦先生凝神守一樸而不露年數百歲後不知所之

龍丘先生

後漢任延為會稽太守吳有龍丘萇者隱居不仕志不降辱掾吏白請召之延曰龍丘先生躬德履義有原憲伯夷之節都尉灑掃其門猶懼辱焉召之不可遣功曹奉謁修書記致醫藥吏使相望於道

楚丘先生

翟普林楚丘人也事親以孝聞州郡辟皆不就躬耕色養鄉閭號為楚丘先生

中岳先生

北齊鄭述祖為兗州刺史初述祖父道昭為兗州於鄭城南小山起亭刻石為記述祖時年九歲及為刺史往尋舊迹得一破石有銘曰中岳先生鄭道昭之白雲堂述祖對之嗚咽悲動羣僚



羅浮先生

唐軒轅集謂之羅浮先生已數百歲而顏色不老立於  
牀上而垂髮至地

九華先生

五代南唐宋齊丘為洪州節度不得志上表乞罷鎮歸  
九華舊隱嗣主知其詐一表即許賜號九華先生青陽  
公食本縣租稅齊丘治大第於青陽服御將吏皆如王  
公而忿鬱尤甚未幾復為洪州節度

東野先生

五代楚徐仲雅馬希範命為學士希範創會春園及嘉宴堂仲雅作詩以紀之詞調清越當世士流無不傳誦性簡傲好嘲噓遇事輒無所畏避嘗退處郊園自號東野先生

棘下生

鄭志曰張逸問張贊曰我先師棘下生何時人鄭玄答云齊田氏善學者所會處也齊人稱之棘下生無常人

也

濟南伏生

後漢伏湛九世祖勝字子賤所謂濟南伏生者也

杜田生

前漢田何字子莊齊人自孔子授易傳至何及秦焚書以易為卜筮之書獨不禁何傳之不絕漢興與齊諸田徙杜陵故號曰杜田生

東海蕭生

漢蕭望之東海蘭陵人宣帝時京師雨雹望之上疏陳災異之說宣帝自在民間聞望之名曰此東海蕭生邪下少府問狀無有所諱對奏拜為謁者

### 九江祝生

漢鹽鐵贊曰九江祝生奮史魚之節發憤懣譏公卿介然直而不撓可謂不畏強禦矣

### 蘇門生

晉阮籍少時常遊蘇門山有隱者莫知姓名有竹實數

斛白杵而已籍從之與談太古無為之道及論五帝三王之義蘇門生出山蕭然曾不經聽籍乃對之長嘯清韻響亮蘇門生逌爾而笑籍既嘯蘇門生亦嘯若鸞鳳之音焉

按晉書阮籍傳籍嘗於蘇門山遇孫登與商畧終古及棲神道氣之術登皆不應籍因長嘯而退至半嶺聞有聲若鸞鳳之音響乎巖谷乃登之嘯也與此小異

### 江東生

唐羅隱詩名當世仕吳越為司勳郎中梁祖以諫議大夫召之不行自號江東生

西方公

宋廬陵王禧文帝第八子也文帝諸子禧尤凡劣兄弟並蚩鄙之明帝詔建安王休仁曰既不比數西方公汝便為諸王之長時禧在西故謂之西方公

清鄉公

隋樊叔畧為上開府儀同三司清鄉公汴州刺史號為明決有巧思營建東都宮室制度皆叔畧所定百姓為之語曰智無窮清鄉公

贊皇公

唐李栖筠初封贊皇縣子栖筠喜獎善而樂人攻已短為天下士歸重不敢有所斥稱贊皇公云

樂和李公

唐李景讓性方毅有守清素寡欲門無雜賓元和後大臣有德望者以居里顯景讓宅東都樂和里世稱清德者號樂和李公

江上丈人

江上丈人者伍員自楚將奔吳至江欲渡無船而楚購員甚急丈人刺小船方將漁員從而請渡焉丈人以船渡員甚德之問其名族不告解千金之劍獻之不受員至為相求丈人不得每食必祭之祝曰名不可得聞形不可得見者其惟江上丈人乎

### 河上公

河上公者莫知其姓字明老子之術結草為菴於河上註老子章句以授漢文帝故世人號曰河上公又曰河

上丈人

安丘丈人

漢安丘望之字仲都長陵人少治老子經恬靜不求進  
官時號安丘丈人成帝聞欲見之望之辭不肯見為巫  
醫於人間後漢耿弇學老子於安丘丈人

吳中高士

晉謝敷會稽人高尚不仕初月犯少微少微一名處士  
星占者以隱士當之譙國戴逵有美才人或憂之俄而

數死會稽人士以嘲吳人云吳中高士便是求死不得死

涼州高士

晉西涼張駿遣參軍王隲聘於劉曜曜謂之曰貴州心欲追蹤竇融和好卿能保之乎隲曰不能曜侍中徐邈曰君來和同而謂之不能何也隲曰齊桓貫澤之盟憂心兢兢諸侯不召自至葵丘之會驕而矜誕叛者九國教化常如今日可也若政教陵遲尚不能察邇郡之變

況鄆州乎曜顧謂左右曰此涼州高士也禮而遣之

青巖男子

唐元稹與史館韓愈論甄濟曰甄生於天寶末蓋青巖一男子爾及亂則延頸承刃分死不回不以不顯而廢忠不以不誅而從亂參合古今之士蓋萬一焉欲執事者編此義烈以永於來世

關東男子

唐白居易以書示元稹曰僕自思關東一男子爾除讀

書屬文外其他曹然無知乃至書畫棊博可以接人之  
歡者一無通曉

嵩山逸人

唐李白題嵩山逸人元丹丘山居詩序曰元公近遊嵩  
山故交深情出處無間品信頻及許為主人欣然適會  
本意當冀長往不返欲便舉家就之兼書共遊因有此  
贈其畧曰故人契嵩穎高義炳丹牘滅迹遺紛囂終言  
本峯壑自矜林湍好不羨朝市樂偶與真意并頓覺世

情薄爾能弄芳桂吾已採蘭若拙妻好乘鸞嬌女愛飛  
鶴提携訪神仙從鍊全生藥

縉雲隱者

唐李陽冰題阮客舊居詩云阮客身何在仙雲洞口橫  
人間不到處今日此中行阮客不見其名氏蓋縉雲之  
隱者也

鹿門隱士

唐皮日休為鹿門隱士書六十篇其序曰醉士隱於鹿

門不醉則遊不遊則息息於道思其所未至息於文慚其所未周故復草隱士書焉

皂江漁翁

五代後蜀蜀州隱者張丘召之不至賜錢十萬丘博學能吟詩數百篇號皂江漁翁集

甫里先生

唐陸龜蒙少高放通六經大義舉進士一不中居松江甫里往從張博遊不喜與流俗交雖造門不肯見不乘

馬升舟設蓬席賫束書茶竈筆床釣具往來時謂江湖散人散人者散誕之人也心散意散形散神散既無羈限為時之怪遂為散人歌或號天隨子甫里先生後以高士召不至

丹崖翁

唐元結為丹崖翁宅銘序曰零陵隴下三十里得丹崖翁宅有唐節督者為隴水令去官家於崖下自稱丹崖翁湘水之異者翁湘中得道之逸者愛其水石為之作

銘其略曰丹崖數岸為其四墉竹幽石皚飛泉戶中怪  
石澄淵硃硃石巔何得石巔翁獨醉眠吾欲與翁東西  
茅宇飲啄終老翁亦悅許

荆臺隱士

後唐荆南節度使高從誨禮賢士委任梁震以兄事後  
梁震固請退不能留乃為築室於土洲震披鶴氅自稱  
荆臺隱士每詣府則跨黃牛至廳事

有莘媵臣 渭濱賤老

魏李康運命論伊尹有莘之媵臣也而阿衡於商太公  
渭濱之賤老也而尚父於周

南山四皓 淮陽一老

前漢應曜隱於淮陽山中與四皓俱徵曜獨不至時人  
語曰南山四皓不如淮陽一老後漢應劭八代祖也

潯陽三隱

宋周續之隱於廬山與劉遺民陶淵明皆不應辟命謂  
之潯陽三隱武帝鎮彭城遣使迎之禮賜甚厚每曰真

高士也

荆楚仙人

宋龔祈辭不應辟命風姿端雅容止可觀中書郎范述見之嘆曰此荆楚仙人也

冀州名士

魏許允世為冠族與清河王經俱稱冀州名士裴潛少弟徽諸子皆為名士而楷才望最高

按裴潛一段與上詞義不連屬當是

原本別為一則而大典誤合為一者



江南望士

晉顧榮初為齊王大司馬主簿昏酣不綜府事以情告友人長樂馮熊熊謂長史葛旗曰府大事煩非酒客之政旗曰榮江南望士且居職日淺不宜輕易代之熊曰可轉為中書侍郎旗然之白王以為中書侍郎在職不復飲酒人或問曰何前醉而後醒耶榮懼罪乃復更飲

西州逸士

晉左思為三都賦徵士皇甫謐為之序陳留衛瓘又為

思賦作解畧曰余觀三都之賦言不苟華必經典要品  
物殊類稟之圖籍辭義瓌瑋良可貴也有晉徵士皇甫  
謐西州之逸士耽籍樂道高尚其志覽斯文而慷慨為  
之序

齊國高士

魯仲連齊人也好奇偉倣儻之策畫而不肯仕宦任職  
好持高節魏將軍新垣衍曰魯連先生齊國之高士也  
齊以仲連說下聊城欲爵之魯連逃隱於海上曰吾與

富貴而詘於人寧貧賤而輕世肆志焉

荊山居士

梁陸法和以道術佐梁元帝帝以為都督郢州刺史法和  
和不仕自稱居士北齊以為荊州刺史詣闕通名但曰  
荊山居士三年間再為太尉世猶謂之居士

東山居士

陳虞寄字次安時陳寶應據有關中潛有逆謀寄每舉  
逆順之理微以諷諫寶應輒引說他事以拒之寄知寶

應不可諫慮及已乃為居士服以拒絕之常居東山寺  
稱東山居士

東宮居士

五代蜀任知玄以太傅致仕琴酒自娛常駕三輪車凡  
城中國林宮寺幽景之所日夕遊覽烏巾鶴氅逍遙曠  
達自號東宮居士

西州智士

漢任文公已郡閬中人明曉天官風角秘要以占術馳

名後以兵寇隱於子公山公孫述時蜀武擔石折文公  
曰噫西州智士死我乃當之自是嘗會聚子孫設酒食  
後三月果卒故益部為之語曰任文公智無雙

南嶽太師

後漢卷縣人雖汜託言稱神坐伏誅後其弟子李廣等  
宣言汜神化不死以誑惑百姓聚眾起兵自稱南嶽太  
師為馬援所破

關東大豪

後漢戴遵字子高平帝時為侍御史王莽篡位稱疾鄉里家富好洽施尚俠氣食客嘗三四百人時為之語曰關東大豪戴子高

南土之秀

晉王導佐元帝上言顧榮賀循紀瞻周玘皆南土之秀願盡優禮則天下安矣帝納焉

江左之秀

晉羅含桓宣武溫辟為州別駕以解舍諠擾於城西池

小洲上立茅屋伐木為牀織葦為席而居布衣蔬食晏如也桓溫常與寮屬宴會含後至溫問衆坐曰此士何如人時有答曰可謂荆楚之材溫曰此自江左之秀豈惟荆楚而已

吳中之秀


晉王忱字元達弱冠知名與王恭王珣俱流譽一時嘗造其舅范甯與張玄相遇甯使與玄語玄正坐歛衽待其有發忱卒不與言玄失望便去甯讓忱曰張玄吳中

之秀何不與說忱笑曰張祖希欲相識自可見詣賓謂  
曰卿風流俊望真後來之秀忱曰不有此舅焉有此甥  
既而賓使報玄玄東帶造之始為賓主

李摩雲

五代梁李罕之項城人為人驍勇力兼數人少學讀書  
不成去為僧以其無賴所往皆不容乃乞食酸棗市中  
人皆不與罕之擲器於地裂其衣又去為盜之澤州日  
以兵鈔懷孟間啖人為食居民避亂屯聚摩雲山羣賊

金史卷之三  
卷三  
攻之不下罕之悉攻殺之立柵其上時人號曰李摩雲  
是時晉方徇地山東頗倚罕之為扞蔽



欽定四庫全書

子部

實賓錄卷

三至五

詳校官中書<sub>臣</sub>李彤

侍讀<sub>臣</sub>孫球覆勘

膳錄監生<sub>臣</sub>秦澐

膳錄監生<sub>臣</sub>陳祁

欽定四庫全書

實賓錄卷三

宋 馬永易 撰

七姓

則二

魯襄公十一年晉悼公會諸侯盟載書曰凡我同盟毋  
蘊年毋雍利毋保姦毋留慝救災患恤禍亂同心以獎  
王室或間茲命司慎司盟名山名川羣神羣祀先王先  
公七姓十二國之祖明神殛之俾失其民墜命亡氏踣  
其國家注云七姓晉衛魯鄭曹滕姬姓邾小邾曹姓宋

子姓齊姜姓莒已姓杞姒姓薛任姓十三國言十二誤矣

唐太宗嘗以山東尚閑閑後雖衰子孫猶世望嫁娶必多取貧故人謂之賣昏乃詔高士廉等摘其譜牒為氏族志又詔後魏隴西李寶太原王瓊滎陽鄭溫范陽盧子遷盧澤盧輔清河崔宗伯崔元孫前燕博陵崔懿晉趙郡李楷凡七姓十家不得自為婚

四姓 五姓

唐柳芳論姓氏曰今流俗獨以崔盧李鄭為四姓加太原王氏號五姓蓋不經也文之弊至於尚官官之弊至於尚姓姓之弊至於尚詐

#### 四族二臣

陸機連珠曰披雲看霄則天文清澄風觀水則川流平是以四族放而唐劭二臣誅而楚寧註四族四凶也左傳楚郤宛之難國言未已子常殺費無極與鄢將師盡滅其族以悅於國於是謗言乃止

三族

魯僖公七年鄭伯使太子華聽命於會言於齊侯曰洩氏孔氏子人氏三族實違君命君若去之以為成我以鄭為內臣君亦無所不利焉

萬石秦氏

秦襲任潁川太守與羣從同時為二千石者五人故三輔號曰萬石秦氏

萬石張家

唐張文瓘拜侍中四子潛為魏州刺史沛同州刺史洽  
衛尉卿涉殿中監父子皆至三品時謂萬石張家

三相張家

唐張嘉貞相玄宗延賞相德宗弘靖相憲宗先第在  
東都思順里盛麗甲當時歷五世無所增葺時號三相  
張家

三戟崔家

唐崔琳伯仲羣從多至大官每燕集組印相輝華轂滿

門設一榻以置象笏猶重疊其上軒裳之盛無與其比  
私第在東都並列祭戟當時號為三戟崔家

### 孝義劉家

唐劉審禮當襲父爵遜其弟不聽見父執必感泗滂沱  
事繼母尤謹與弟延景為師友得祿多資之而妻子執  
寒苦晏如也再從皆同居合二百口內外無間言子易  
從又以孝聞時號為孝義劉家

### 法名家

後漢吳雄少時家貧喪母營人所不封土者擇葬其中  
喪事趣辦不問時日醫巫皆言當滅族而雄不顧及子  
訢孫恭三世廷尉為法名家

真書盧家

唐盧詹尚書任吏部押官告楷署其名字體道麗時  
人謂之真書盧家

孝行張氏

宋張楚母疾命在屬續楚祈禱苦至燒指自誓精

誠感悟疾時得愈詔榜門曰孝行張氏之閭

孝張里

唐白居易為河州刺史張擇神道碑曰張為著姓尚矣  
自漢太傅良侍中肱晉司空華丞相嘉以降勲賢軒  
冕歷代不乏肱避地渡江始居於吳故其子孫稱吳郡  
人嘉以孝弟聞於郡故其所居號孝張里

闕下林家

唐林攢莆田人貞元初為福唐尉親亡自挺甓作塚廬

其右有白鳥來甘露降觀察李若遣官驗實會露晞里  
人失色攢哭曰露禍我耶俄而露復降鳥亦回翔詔作  
二闕於母墓前又表其閭蠲徭役時號闕下林家

釵鏤王家

後魏太原王氏四姓得之為美故呼為釵鏤王家

謹案李肇

國史補云四姓惟鄭氏不離蒙陽有岡頭盧澤底李士  
門崔皆為禹甲太原王氏亦四姓之匹而世呼為釵鏤  
王家帶銀質面金飾也據此則  
四姓乃鄭盧李崔附識於此

書樓張家

五代周張昭遠好學積書萬卷以樓載之號書樓張家

龍舌張氏

唐開元中南陽張嵩都護北庭或告黑河有龍宜祀之  
嵩乃脩牲牢令左右挾弓矢侍其側祀於河上俄有巨  
龍長百尺伸其舌數尺方將就食發矢射之中其脅而  
死封其首具表以聞上壯其勇詔斷舌函以賜嵩因賜  
號為龍舌張氏

不語楊家

五代吳楊行密其先弘農人後家於合肥世有一子病瘖鄉里號為不語楊家

世修降表李家

五代蜀李昊仕前蜀為翰林學士仕後蜀位宰相前蜀王衍降於莊宗昊草其表後蜀孟昶之降其表亦昊所為蜀人憤之有潛題其門者云世修降表李家見者哂之

修行諸楊

唐濠州錄事參軍楊道直四子發假收嚴取四時義皆  
舉進士第發收仍位顯列號修行諸楊與靖恭諸楊同

盛

案北亭瑣言楊收父名惟直非道直官蘭谿縣主簿  
非濠州錄事參軍號曰修竹楊家非修行諸楊今俱

仍其舊而附  
錄以備考

靖恭諸楊

唐祭酒楊寧四子汝士虞卿漢公魯士並知名於時汝  
士少苦學善屬文至老手不釋卷終於刑部尚書開成  
初汝士為劔南東川節度使時族弟嗣復鎮西蜀對節

制閫以篇詠往來時人榮之初虞卿與汝士同為省郎  
並嘗知制誥而虞卿資望居先乃求判南曹以避之士  
林多其相讓兄弟敦睦時稱盛閑號靖恭諸楊

二王

六則

後漢王丹資性方潔王良在位恭儉而宣秉亦甘疏薄  
鄭均恭儉節整贊曰宣鄭二王奉身清方云

晉羊祜正慤無私疾惡推仁從甥王衍嘗詣祜陳事辭  
甚俊辯祜不然之行拂衣起步闌之後祜以軍法將斬

王戎故戎行並憾之每言論多毀祐時人爲之語曰二王當國羊公無德

王子猷子敬曾俱坐一室上忽火發子猷遽走避不遑取屐子敬神色恬然徐喚左右扶憑而出不異平常以此定二王神宇注子猷微之子敬獻之皆羲之子也宋王延之少靜默宋德既衰齊高帝輔政朝野之情人懷彼此延之時爲僕射與尚書令王僧虔中立無所去就時人語曰二王居平不送不迎高帝以此害之

齊張融善草書常自美其能帝謂之曰卿書殊有骨力  
但恨無二王法耳答曰非恨臣無二王法亦恨二王無  
臣法

梁王銓美風儀學業不及弟錫而孝行齊焉時人謂銓  
錫二王可謂玉昆金友

三王則三

江夏安樂縣有三王城漢末王匡王鳳王常所屯故謂  
之三王城

唐韓愈為修滕王閣記曰愈少時即聞江南多登臨之美而滕王閣為第一有瑰瑋絕特之稱及得三王所為序賦記等壯其文詞益欲往一觀而讀之以忘吾憂繫官於朝願莫之遂今為記竊喜載名其上辭列三王之次有榮耀焉注云王勃作游閣序王緒作賦今中丞王公為從事日作修閣記中丞謂王仲舒云

唐王珣方翼之子也與兄璵弟璿皆以文學稱時號為三王

## 二鍾

晉鍾會是荀濟北從舅二人情好不協荀有寶劔可直  
百萬常在母鍾夫人處會善書學荀手跡作書與荀母  
取劔仍竊去不還荀知是鍾書而無由得思所以報之  
後鍾兄弟以千萬起一宅始成甚精麗未得移住荀極  
善畫乃潛往畫鍾堂門作太傅形狀衣冠狀貌如平生  
二鍾入門大感慟宅遂空廢注云太傅名繇二鍾謂繇  
二子毓會云

二曹

後魏彭城王勰初為侍中又除中書監後以南征復命為中軍大將軍加鼓吹一部勰以寵授頻煩乃面陳曰臣聞兼親踈而兩並異同而進此既成文於昔臣願頌之於後陳思求而不允臣不請而得豈但今古云殊遇異否泰帝大笑執勰手曰二曹才名相忌吾與汝道德相親緣此而言無慙前列

原註曹元首六代論云兼親踈而兩用泰同異而並進

二陳

晉文帝與二陳共車過喚鍾會同載故駛車委去比出已遠既至因嘲之曰與人期行何以遲遲望卿遙遙不至會因答曰矯然懿實何必同羣帝復問臯陶何如人會答曰上不及堯舜下不逮周孔亦一時懿士注云二陳蹇與泰也會父名繇故以遙遙戲之蹇父矯宣帝懿泰父羣祖實故以此酬之

二陸三張

晉張載弟協有才齊名亢才藻不逮二昆亦有屬綴時

人謂載協亢陸機雲曰二陸三張史臣曰二陸入洛三張減價考覈其文非徒語也

三張

則二

後漢順帝時張陵客遊蜀土斂租稅米謀為亂階時被蛇吞其後陵孫張魯行其祖術後於漢中自稱師君禍亂方起為曹公所滅又中平元年鉅鹿張角自稱黃天部師有三十六將皆着黃巾衆至十萬何進將兵滅之珠林號為三張

唐崔祐甫為洪州都督張休遺愛碑曰昔張揖珪牧洪州甚得人譽張九齡繼之逮府君又有裕焉故邦人有三張之目

二解

晉孫旂潔靜少自修立舉察孝廉累遷黃門侍郎出為荊州刺史名位與二解相亞時解系與弟結並清身潔已甚得時譽皆仕黃門刺史云

三陸

則

南齊陸惠曉三子僚任倬並有美名時人謂之三陸

唐陸宸與宗人希聲威文才重德名冠一時朝中號三

陸

東海三何

梁何思澄與宗人遜及子朗俱擅文名時人語曰東海

三何子朗最多思澄聞之曰此言誤耳如其不然故當

歸遜思澄意謂宜在已也子朗早有才思常為敗家賦

擬莊周馬捶其文甚工世人語曰人中爽爽有子朗

梁按

書子朗當為敗家賦擬莊周馬搖今改正

## 二傳

齊丘仲孚字公信遷山陰令居職甚有聲譽百姓謠曰  
二傳沈劉不如一丘前世傳琰父子沈憲劉玄明相繼  
宰山陰並有政績言仲孚皆過之

## 三李

後魏高允作徵士頌趙郡李詵令孫李靈武符李遐仲  
熙三人頌曰趙實名區世多奇士山岳所鍾挺生三李

矯矯清風抑抑容止初九而潛望雲而起詵尹西都靈  
惟作傳載訓皇宮載理雲霧熙雖中天迹階郎署餘塵  
可挹終亦顯著

二黃

黃穆字伯開博學為山陽太守有德政致甘露白兔神  
爵白鳩之瑞弟英字仲開為武陵太守貪穢無行武陵  
人諺曰天有冬夏人有二黃言不同也

兩邢二魏

後魏魏季景清苦自立博學有文才弱冠有名京師時  
邢子明稱有才學殆與子才相伴季景與收相亞洛中  
號兩邢二魏

二李三楊

唐李德裕李宗閔楊虞卿弟漢公汝士傳讚曰漢誅鉤  
黨魏破疽囊何鄧之後二李三楊偷權報怨任國存亡  
書茲覆轍敢告巖廊

三楊

唐楊虞卿當李宗閔牛僧孺輔政累遷給事中虞卿佞柔善諧譎權倖倚為姦利歲舉選者皆走門下書第注員無不得所欲升沉在牙頰間當時有蘓景徹張元夫而虞卿兄弟汝士漢公為人所奔向故語曰欲趨舉場先問蘓張蘓張猶可三楊殺我

三周

梁周弘正善玄理為世所宗弟弘遜性簡素博學多通幼弟弘直方雅敦厚氣調高於次昆或問三周孰賢人

曰若蜂腰矣

按南史周弘正弟弘讓弘直此書弘讓作弘遜似有所避忌而易之者未詳其說姑

仍原文而附識於此

## 二武

唐武元衡武孺衡史臣曰二武爽技精才為時羽儀

## 三羅

唐羅虬詞藻富贍與宗人隱鄴齊名咸通乾符中時號

## 三羅

## 二馮

馮宿弟定皆有文學舉進士時人比之漢朝二馮君史  
臣曰三高並秀於一時二馮爭趨於千里咸以搞英揆  
藻華國揚名

### 八裴八王

裴徽字文秀第三子楷字叔則楷弟綽字季舒楷子瓚  
字國寶楷孫欽子邈字景初瓚子遐字叔道徽第二子  
康字仲豫楷孫季子頤字逸民王祥字休徵族子戎字  
濬沖戎從弟衍字夷甫衍弟澄字平子戎子綏字萬子

衍子玄字眉子覽孫導字茂弘覽孫基子敦字處仲謂  
之河東八裴琅邪八王

前賈後張

唐張仁愿檢校洛州長史會多盜仁愿一切捕殺皆積  
府門畿甸震懾無敢犯先是賈敦頤嘗為長史有政績  
時人為之語曰洛有前賈後張敵京兆二王

大荀小荀

晉荀晞代王敦為青州以嚴刻立功日加斬戮流血成

川人不堪命號曰屠伯後晞出屯無鹽以弟純領青州  
刑殺更甚於晞百姓號小荀酷於大荀

大崔生小崔生

後魏崔亮與族兄光依隴西李冲冲見亮甚奇之以為  
館舍謂其兄子產曰大崔生寬和篤雅汝宜友之小崔  
生峭整清激汝宜敬之二人終將大至

大鄭君小鄭君

後魏鄭述祖為兗州刺史時有一人入市盜布歸其父

怒曰爾負吾君執之以歸首因特原之自是境內無盜  
先是迷祖父道昭亦嘗為兗州刺史至是百姓歌曰大  
鄭君小鄭君相去五十載風教猶尚存

老杜小杜

唐杜甫杜牧皆以詩聞於時世以甫為老杜牧為小杜  
云

大令小令

王珉代王獻之為中書令二人素齊名世謂獻之為大

令珉為小令

原註晉陽秋云王大令王  
小令獻之珉四從兄弟也

大樞小樞

偽蜀潘炕累遷宣徽南院使內樞密使出為黔南節度  
而從弟峭代掌樞機自黔召還值元膺亂復為內樞密  
使兄弟同掌機衡號為大樞小樞

大二小二

後魏崔長謙與兄休第二子仲文同年而月長其家謂  
之大二小二

二仲

漢求仲羊仲不知何許人皆治車為業挫廉逃名蔣元卿之去兗州還杜陵荆棘塞門舍中有三徑不出唯二人從之游時人謂之二仲

五伯

後漢鄧彪字智伯南陽新野人與同郡宗武伯翟敬伯陳綏伯張弟伯同志好齊名南陽號五伯

二玄

晉謝玄為會稽內史時吳興太守張玄之亦以文學顯與玄同年之郡而玄之名亞於玄時人稱為南北二玄論者美之

二超

齊檀超高平金鄉人少文學弛誕任氣嗜酒好談詠自比晉郝超言高平有二超又謂人曰猶覺我為優也

三長

郭篤字長信與從舅扶風郡王宏字長文平陶字長材

相善並知名海內號太原有三長焉

二衡

唐武元衡洎從弟儒衡贊曰后族崢嶸平一辭榮高風  
襲慶鍾在二衡

八慈二方

後漢陳寔六子紀諱最賢紀字元方諱字季方齊德同  
行父子並著高名荀淑贊曰太丘道廣模我彞倫曾是  
淵軌薄夫以惇慶基既啟有蔚潁濱二方承則八慈繼

塵

大小王東陽

梁王承為東陽太守性簡貴有風格右衛朱异當朝用  
事每休暇車馬填門有魏郡申英者門寒才俊好危言  
高論以忤權右指异門曰此中輻湊皆為利往能不至  
者惟大小王東陽耳小東陽即承弟幼也

韓李二文公

唐韓愈謚曰文而李翱始從愈為文章辭致渾厚見推

當時故有司亦謚曰文史臣曰韓李二文公於陵遲之末遑遑仁義有志於持世範欲以人文化成而道未果也

### 杜衛二氏

晉衛顗及子瓘皆善草書至杜預三世善草書時人以衛瓘父子比之謂之杜衛二氏焉

### 韋氏三宗

唐韋貫之傳史臣曰韋氏三宗世多才俊純樸忠懿為

時元龜三宗謂貫之及祖曼并嗣立云

方王

梁柳澄字文深少有大意通老易官黃門侍郎與瑯琊王峻齊名俱為中庶子時人號為方王

太阿

晉潘安仁揚荊州誄曰周賴尚父殷憑太阿註云太阿阿衡謂伊尹也

孝泌

齊江泌性行仁義衣敝蟲多綿裹置壁上恐蟲饑死乃  
復置衣中數日間終身無復蟲母墓為野火所燒依新  
宮災三日哭淚盡繼之以血與族人泌同名世謂泌為  
孝泌以別之

